

671.3443

078  
16

2819

光州志

光州志卷之六

光州直隸州知州楊修田總纂

宦蹟列傳

唐

陳詠

子章甫

陳詠字正雅舊爲光州人因祖元光戍閩有功世守漳州刺史遂爲閩人幼有識趣大厯間採訪使薦於朝刺史鄭昌仕亦表其器可比仇香乞爲京兆別駕常袞召之力請外補授汝南錄事轉恩州叅軍十二年京兆尹黎幹請於朝曰陳詠酬酢如鐘含音大小隨叩如水待汲方員隨器

乞留府攝治中事上從之十四年丁父憂起復補光州司馬尋加本州團練使率正直遵國憲令行禁止光人德之子章甫字尙冠建中初舉明經貞元四年除廬州司理尋遷西南督府叅軍十九年轉光州司馬代父本州團練元和三年轉京兆司田兼領度支郎中以父病乞終光州左拾遺獨孤郁不可翰林承旨裴珀曰自古忠孝難全今章甫在光州一方無盜是忠於國親養隨之又得辰夕致孝臣子報君唯此兩事議上詔許之元和十二年詠卒章甫扶柩歸葬於漳敬宗初復補光州司馬加團練使輔國左將軍士民愛之如慈母

舊志

柴再用

柴再用汝陽人光州刺史天祐初朱全忠攻淮南遇兩自  
申抵光道險人馬困乏士卒無依將亡去乃使人嚇再用  
曰下我以汝爲蔡州刺史不下且屠城再用嚴守城備戎  
服登城見全忠曰光州城小兵弱不足以辱王之威怒王  
苟先下壽州敢不從命全忠留旬日而去又前行失道比  
及壽州壽人堅壁清野以待之乃退屯正陽十一月丙辰  
全忠渡汝而北再用抄其後軍斬首三千級獲輜重萬計

節舊志

宋

劉越

劉越字子長大名人少孤貧有學行擢進士嘗知襄城固始二縣有能名累官秘書丞會禁中火詔劾火所從起越與滕宗諒疏諫仁宗為罷詔獄又請章獻太后還政太后崩擢嘗言還政者時越已先卒遂贈左司諫節舊志○祀固始名宦

鄭俠

鄭俠字介夫福州福清人治平中隨父官江甯閉戶苦學王安石知其名邀與相見稱獎之中進士高第調光州司法案軍光有疑獄俠讞議傳奏安石悉如其請俠感為知已思欲盡忠秩滿徑入都見安石時初行試法令選人中

式者超京官安石欲使以是進俠以未嘗習法辭問以所  
聞對曰青苗免役保甲市易數事與邊鄙用兵在俠心不  
能無區區也安石不答俠退不復見但數以書言法之爲  
民害者久之監上安門安石雖不悅猶使其子雱來語以  
試法事置修經局又欲辟爲檢討更命其客諭意俠曰讀  
書無幾不足以辱檢討所以來求執經相君門下耳而相  
君發言持論無非以官爵爲先所以待士者亦淺矣果欲  
援俠而成就之取其所獻利民之事行其一二使進而無  
愧不亦善乎是時免役法出民商咸以爲苦稅務索市利  
錢其末或重於本商人至以死爭如是者不一俠因各列

其事未幾詔小夫負販者免征商之重者十損其七是時自熙寧六年七月不雨至於七年之三月人無生意東北流民扶攜塞道羸瘠愁苦身無完衣居民買麻粃麥麩合米爲糜或茹木實草根有身被鎖械而負瓦楬木賣以償官者知安石不可諫悉繪所見爲圖奏疏詣閣門不納乃假稱密急發馬遞上之其畧云去年大蝗秋冬亢旱麥苗焦枯五重不火羣情懼死方春斬伐竭澤而漁草木魚鼈亦莫生遂災患之來莫之或禦願陛下開倉廩賑貧乏取有司培克之政一切罷去冀下昭和氣上應天心今左右輔弼又皆貪猥近利使夫抱道懷識之士皆不欲與之言

陛下以爵祿駕馭忠賢而使人如此甚非社稷之福也  
南征北伐者皆以其山川之形爲圖來獻料無以天下之  
民質妻鬻子斬桑壞舍流離逃散之狀上聞者臣謹以逐  
日所見繪一圖但經眼目已可涕泣而况有甚於此者乎  
如陛下行臣之言十日不雨卽乞斬臣宣德門外以正欺  
君之罪疏奏神宗反覆觀圖長吁數四袖以入是夕寢不  
能寐翌日命開封體放免行錢三司察市易司農發常平  
倉三衛具熙河所用兵諸路上民物流散之故青苗免役  
方田保甲並罷凡十有八事民間譁叫相賀又下責躬詔  
求言越三日大雨遠近沾洽輔臣入賀帝示以快所進圖



狀且責之皆再拜謝安石上章求去外間始知所行之由  
羣姦切齒遂以佞付御史治其擅發馬遞罪呂惠卿議致  
之死帝曰佞所言非爲身也豈宜深罪但徙英州旣至英  
人無貧富貴賤皆加敬爭遣子弟從學爲築室以居哲宗  
立始得歸蘇軾孫覺表言之以爲泉州教授元符七年再  
竄於英徽宗立赦之仍還故官又爲蔡京所奪自是不復  
出布衣糲食屏處田野然一言一話未敢忘君宣和元年  
卒年七十九里人揭其闕爲鄭公坊州縣皆祀之於學

宋史

葛密

葛密江陰人舉進士爲光州推官豪民李新殺人嫁其罪於邑民葛華且用華之子爲證獄具密得其情出之法當賞力白州使勿言仕至太常博士天性情靜年五十忽上章致仕姻黨交止之笑曰俟罪疾老死不已而休官者安得有餘裕哉卽退居號草堂逸老年八十四乃終子書思踵登第調建德主簿時密已老欲迎以之官密難之書思曰曾子不肯一日去親側豈以五斗移素志哉遂投劾歸養十年餘近臣表其志行以爲泗州教授弗就密不得已許以他日偕行始乞監新市鎮居父喪哀毀骨立盛暑不釋苴麻終禫不忍去冢舍累年乃出仕歷知漣水軍時兄

書元爲望江令同隸淮南監司有捨兄而薦己者移書乞  
改薦兄不許則封檄還之其篤行類皆若此仕至朝奉郎  
亦告老父子歸休皆不待年卒年七十二特謚曰清孝  
簡

宋史

### 岳飛

建炎七年飛久見帝問曰卿得良馬否飛曰臣有二馬日  
啖芻豆數斗飲泉一斛然非精潔卽不受介而馳初不甚  
疾比行百里始奮迅自午至酉猶可二百里褫鞍甲而不  
息不汗若無事然此其受大而不苟取力裕而不求逞致  
遠之材也不幸相繼以死今所乘者日不過數升而秣不

擇粟飲不擇泉攬轡未安踴躍疾驅甫百里力竭汗喘殆  
欲斃然此其寡取易盈好逞易窮鴛鈍之材也帝稱善進  
拜太尉繼除宣撫使兼營田大使從幸建康以王德用  
兵隸飛詔諭德等曰聽飛號令如朕親行飛手疏言金人  
所以立劉豫於江南蓋欲荼毒中原以中國攻中國粘罕  
因得休兵觀釁臣欲陛下假臣日月便則提兵趨京洛據  
河陽陝府潼關以號召五路叛將既還遣王師前進彼必  
棄汴而走河北京畿陝右可以盡復然後分兵潛滑經畧  
兩河如此則劉豫成擒金人可滅社稷長久之計實在此  
舉帝答曰有臣如此顧復何憂進止之機朕不申制又召

至寢閣命之曰中興之事一以委卿命節制光州飛方圖  
大舉會秦檜主和遂不以德瓊兵隸飛

節宋史

### 周虎

周虎字叔子臨淮人理宗時以甲第歷知光州時州爲邊  
境虎計切根本疏省差豪右爲將佐以寬役脚免民兵久  
役以便民時寬諸路民積草恐資敵寇厚兩淮生聚以繫  
邊人之思朝議允行民困以蘇移守和州僅七千疲卒敵  
人以三十萬眾來攻虎多方守禦州民得全後移知文州  
卒和人德而哀之建祠以祀並祀其母號其祠爲忠烈廟

節舊

志

劉炯

劉炯字季銘建陽人朱子弟子慶元己未進士知固始縣

出朱子實紀  
祀固始各宦

周綱

周綱字慶和濂溪子燾之次子燾元祐三年李常寧榜登第終徽猷閣待制綱以父蔭官固始丞

出元公年表  
祀固始各宦

徐矩

徐矩浙江武義人淳熙十一年以明經授固始縣主簿終朝散大夫勤於厥職民受其賜明邑令吳周附入各宦祠

祭之

本舊志

王迸

王迸字純父饒州樂平人以鄉舉爲固始主簿攝邑篆金  
兵犯淮守令望風遁去迸度力不能禦懷印投井死

本宋史祀

名宦

元

曷刺兀速兒吉士

曷刺兀速兒吉士至元九年見世祖詔入大官直從討叛  
王頌賜金帛甲冑鞍馬以才堪使遠成宗時奉命往高麗  
和林江西福建皆不失使指還授忠勇校尉中書直省舍  
人出監息州遷奉訓大夫

節舊志

董珪

董珪舉進士至正間任息州知州兼管本州諸軍與魯勸農事居官滿考德政四訖民懷其惠

本舊志

張瑄

張瑄至正間任息州學正優於文學嚴師範勤訓迪教有成法人材輩出焉

本舊志

孔思迪

孔思迪字凝道先聖五十四代孫至治間任光山令盡心養教治行有聲邑人繪其績爲圖以誌不忘

本舊志

王思忠



王思忠至元二年任固始縣尹至自京師謁夫子廟新造之誓獨切於懷觀其發廩積粟續常平之故典布哇栽桑立務本之新規崇詩書之教廣聖賢之傳可謂今之循良矣

本舊志

明

車誠

車誠餘姚人洪武初以賢良方正知光州擔簦而至菲食惡衣泊如也性鯁介不畏強禦人不敢干以私時兵燹之後戶口失散城池學校皆廢誠以次修營勞來安集孜孜靡懈光之良牧斯爲首稱

節舊志

宣仲庸

宣仲庸無錫人進士洪武間知息縣性廉敏毅然有爲邑故徭役無常供輸不一仲庸驗之戶口准以貧富凡有徵需皆與眾誓於神以示無私是以官無墮事民無怨辭尤留心學校策勵生徒人材多底成就

節舊志○祀息縣名宦

周洪

周洪山東武城人洪治初以御史謫知光山縣剛方廉介臨事不撓豪猾畏憚之值歲饑洪悉心賑救不遑寢食全

活者甚眾後擢四川僉事

本省志○祀光山名宦

高遷

高遷字景升金壇人洪武間任光山教諭尋陞國子監學錄時選使日本改授行人賜一品服以行及還上以爲不辱君命賚予甚渥薦紳咸爲歌以榮之

節舊志

### 周濠

周濠浙江奉化人景泰初知光州愛民育士爲時首稱擢山西提學僉事州人不忘其德立祠祀之

本省志

### 查穀

查穀興化人景泰初以鄉舉爲光州學正大樸無華科條整飭士類興起侍御劉廷瓚以文章行誼受知後舉進士令積溪往謁其廬執弟子禮甚恭穀亦闔門自重時人聞

其風雨賢之

節舊志

曾瑀

曾瑀太和人天順六年以薦舉任光山令值歲屢暵瑀於烈日中祈禱澍雨卽應去後民爲立喜雨碑以紀其事

節舊志

王思學

王思學南漳人初任息尉有才名正統己巳間以薦遷本縣令愷悌爲德政簡刑清民仰之如父母以病去民爲立

去思碑祀名宦

本舊志

薛良

薛良字允良和州人以鄉舉任光州學正薦知獲嘉多惠  
政天順三年調任固始縣時南岡瀨水居民多被浸沒良  
設法修築之又興水利以溉田建閘置埧以時啟閉邑民  
大得其利後聽事堂產紫芝野田麥秀三歧咸以良循績  
所致成化三年秩滿當去爲邑民保留加六品俸仍知縣  
事五年以憂去嘗修邑志作勸農歌百姓歌咏之有去思

碑

本舊志○祀  
固始名宦

陳堅

陳堅臨高人天順初由太學生知息縣以文學飭吏事以  
平易體民情上不撓其政下實蒙其惠去後人皆思慕之

本舊

志

蔡斌

蔡斌饒州人幼與吳康齋爲友好學篤行言動不苟天順間任光山訓導以躬行爲教嘗謂作聖之基自小學始遊其門者皆恪遵之士風遂變

節舊志○祀光山名宦

王剛

王剛撫甯人成化間以國子生知息縣性果敢剖決如流盜賊憚其威相戒不入境一時稱爲健吏者皆以剛爲首

云

本舊志

何澄

何澄字叔清侯官人成化二年以鄉舉任固始縣教諭詩文清勁操履端嚴教課有方士風丕變七年辛卯科鄉試充應天同考官所取多知名士

節舊志

夏賚

夏賚富陽人成化二十年以鄉舉任息縣教諭經術湛深教士以有體有用之學士遂遠去浮華競趨於實後陞翰

林院檢討祀名宦

節舊志

汪貴

汪貴字良貴歙縣人進士洪治間自嘉善縣尹調補固始職剔積弊不爲權豪所屈一時聲譽赫然興學校課農桑

節費寡慾淡泊明志後疾卒囊無別儲唯圖書數卷而已

節舊

志

康恭 喬彪

康恭朔州人洪治初以鄉舉任息縣令廉慎有爲政務咸舉士民頌之癸丑計興治聲舉河南第一恭之後有喬彪成安人洪治末亦以鄉舉任息縣令性勤敏優於政事戶口日增編里一十有三因舊城垣址甃以磚石增樓鋪浚隍池至今賴焉

節舊志○彪  
祀息縣各宦

李鏜

李鏜字孔音山東新城人正德八年以鄉舉任溫縣令遷



守光州時流賊鉅萬橫行淮右光城首被焚掠官署民居  
蕩然煨燼鏗下車見瘡痍殘敝百計撫循首築城垣易以  
磚石樓櫓雉堞皆森嚴不可犯他如舉廢弛理荒穢興土  
類芟豪強遠近老稚悉呼父母且當干戈甫息土盜竊發  
鏗督役嚴緝窮其株根遠近震懾幾有外戶不閉之效及  
遷去士民遮道泣留歷久猶思慕之後歷金部正郎轉運

使節舊志○  
光州各宦

### 李允恭

李允恭平原人監生正德六年知商城縣時流寇爲亂攻  
陷數邑允恭抵任卽築城爲戩守計役未畢而賊至勢危

甚急率士民登城併力捍禦號令嚴明眾皆効死賊來以強弩射之攻三日不能克遂解圍去

節舊志

### 張傑

張傑字彥淵陝西隴右人正德庚辰間以鄉舉署州司訓爲人儀表端正鐵面修髯竟日危坐無笑容以師道自尊遜膠序喆士日與講釋雖寒煥不輟自奉澹泊喜瞻寒士三年內陶鑄羣材以名位顯者數十輩遷南京國子學錄校讐史記漢書大司成甬川張公深器重之轉成都別駕監稅有法一錢不私蜀人德之卒於官爲當道優卹光士聞之咸出資以助柩乃還里

節舊志

吳周

吳周字南夫華亭人以鄉舉知羅源縣母老歸養嘉靖元年薦知固始以濟物爲心見利必興邑陂塘多湮塞曲河無填闢咸親履其地教民蓄泄之方以資灌溉作水利圖及勸諭農桑錄以導民教諭王仕爵卒遺一子其弟利其財欲加害周捐俸屬司訓張晟杜宏助理喪事盡籍所遺付其子力保全之後致仕行取不起

節舊志

余誠 劉秉仁

余誠內江人嘉靖初以鄉舉知息縣事勤於政事尤好文學每公餘卽集多士講經課藝雖寒暑不輟士皆知向學

人文興起又劉秉仁任邱人嘉靖中亦以鄉舉知息縣仁而能斷寬而有節均徭役平訟獄勤考課治績纍纍嘗檄勘新蔡地則壤成賦上不虧公下不累民蔡人至今稱之擢沂州知州

節舊志

### 黨承賜

黨承賜忻州人嘉靖九年以進士知光山性端方蒞政有體尤精於考核官事整理吏無舞文者歷三載始終如一

百廢俱舉後入各宦

節舊志

### 孫懋

孫懋浙江慈谿進士嘉靖十三年謫知光州性直剛不撓

先在諫垣彈劾貴戚左遷縣貳尋厯憲使又以事忤當道復謫知光州蒞政嚴肅公堂竟日危坐四境晏然自奉儉約不肯擾民未朞月擢山東副使去之日行李蕭然祇一從一橐圖書數卷而已時稱汝南清白吏之冠

簡舊志

### 張邦直

張邦直長清人嘉靖十七年以國子生任息縣訓導德性渾堅身無遺行嘗謂孝弟爲仁之本本根不立學必不克有成每以是迪導多士士嚮慕之至以爲叔度復出云

簡舊志

### 張繩

張縉江南高郵州舉人嘉靖十九年知光州勤政事重廉節愛民省費惠政大行又吏治精嚴令行禁止黠吏亡敢撓法性好學每政暇萃郡之子弟於靜齋與譚道藝暨暨不倦後引年東歸士民遮道挽之不得所著有杜律本義詩餘圖譜行於世

節舊志

### 邵思忠

邵思忠順榆人嘉靖十三年以鄉舉知商城性廉潔不以一介累人實心任政凡利民之事皆盡力爲之獎節行恤孤矧慎刑獄均賦役諸所注厝種種宜民至搏擊豪強滌剔姦弊尤不遺餘力在官五年如一日也

節舊志

韓岳

朱永年

韓岳餘姚人進士嘉靖十九年以御史謫知光山舊志謂其除巨豪閭里晏然剽積盜牢山甯息見義必爲仁者之勇也岳之後有朱永年儀真人嘉靖二十八年以鄉貢知光山自奉省約聽斷無私吏胥不敢受賄民咸賴之且抗權貴禁豪猾繼岳爲政境內甯肅

節舊志

邵鳴岐

邵鳴岐東安人嘉靖間以鄉舉知息縣寬而不弛廉而不刻規畫甯一政教有成以外艱去士民至今慕之歷官南

京工部郎中雲南廣西知府

本舊志

滕霽

滕霽建安人嘉靖三十四年以鄉舉知息縣性高爽有學行每事引繩披根初不以三尺假人教士養民兼通武畧遇有盜警卽躬往捕之故盜賊屏跡村落晏然嘗遣家人南還邑人感其德以錢帛助治行裝霽峻却之曰吾志在清潔終不以妻孥溫飽累也先嘗司浦縣鐸浦人懷之至是陳請借寇卽轉浦縣令息民留之不得爲立去思碑節舊志

朱謨

朱謨江南華亭人嘉靖間爲州學正言行不苟威儀中則



教人以聖賢爲期不納寒士之餽士人有不能舉火者捐俸周之蓋篤實君子也有子舉鄉試遂解組歸

節舊志

陳鈇

陳鈇江南常熟人嘉靖間爲龍游令有治聲以里誤謫光州添註同知嘗以公事赴省爲決他縣疑獄數十條當道以才行第一薦之會世宗南巡委鈇協修新野行宮督造如制帝駐蹕忻然欲大用之以佞臣某求賄不聽乃誣以他事落職遂留寓光州卜居於郝司馬故宅扁曰信美樓扃戶謝客以琴書自娛後櫻疾沐浴北向再拜默坐而逝

節省志

沈紹慶

沈紹慶崑山人進士嘉慶三十四年知光山志切民瘼興廢修做口不暇給至奉文丈量田畝詳定四路行糧則例

見賦役志

永遠遵守民尤便之

節舊志

錢之選

潘敦復

錢之選常熟人嘉靖三十七年以進士知固始閱二歲陞兵部主事潘敦復夏津人萬曆十四年亦以進士任僅一歲以憂去後陞工部主事二令任事時皆年甫弱冠有守有爲明邑人余繼善謂比年弊竇如叢廢弛淺遲極矣不得一人更張之其究也莫可收拾時則錢公振刷於前潘

公精核於後二公皆以綺年彊幹風采颯發戴星坐堂皇  
上吏胥莫敢仰視案牘手裁弊孔盡塞是整飭吏治非精  
明果斷不克勝其任也

節舊志

楊偲

楊偲號兩全陝西富平人御史爵子爵以忠諫著聲臺垣  
天下皆呼爲榭山先生而不名偲於嘉靖三十八年以勇  
經任固始教諭能守其家學涵華表璞文行卓然多士則  
之

本舊志

邱騰

邱騰河陽州人嘉靖四十四年以進士知固始初抵任年

始旣冠慕循良之治敷政以惠養爲先慈祥愷悌恥言擊  
斷事母尤純孝以安輿迎之署色養備至邑人化之舊志  
稱爲綺齡粹質雅志古人甘雨和風澤被窮瘡良不誣也  
歷二載陞戶部主事

節舊志

### 趙如崑

趙如崑沙河人隆慶初以歲貢知息縣勤心撫字百廢俱  
修省里甲行均輸刊定條鞭法至今遵守邑地勢平坦寇  
來輒不可禦如崑開濬內外城濠遂成金湯之固又邑東  
遠接鳳穎稽查難周移巡檢司於固城倉以爲儆備皆不  
易之經畫也擢鳳陽府通判尋知和州

節舊志

丁懋儒

周世科

丁懋儒聊城人以進士令中牟隆慶元年調知光山性明敏有治才遇事剖決如流時邑爲大楚孔道政務繁劇懋儒處之裕如事事有章程人不擾而政自理民咸賴之懋儒之後有周世科內江人進士隆慶二年任志操清介革除科派甚多邑人亦食其惠

節舊志

陳華

陳華字惟實福建龍溪人萬曆初以舉人任光州守其先人元光本光州人有功唐代世守閩始居於閩以故華視光之紳士黎庶猶其親嫻比黨也時執政者以天下賦法

不一奏行一條鞭法奉行者猶未盡善華延訪民隱汰其  
蠹弊以成畫一人咸便之拓建學宮振興文教又州志殘  
缺禮聘郡人刑部郎中陳璋修補既去之後士民感其德  
因元光舊封廣濟王爲建廟儒學東以華配食復祀之名  
宦祠中

節舊志

### 陳以忠

陳以忠字貞甫江南無錫人以舉人任寧州知州有捕盜  
功爲忌者中傷謫寶雞令未幾舉卓異補光州知州性明  
敏能折獄捕豪吏置之法民皆畏服亡何以疾歸州人士

思之祀名宦祠

節舊志

韓志道

韓志道章邱人進士萬曆二年知光山性嚴明足以理繁劇吏不敢姦民不敢欺於時境內肅清道無拾遺者然以勁直不阿卒爲小人中傷公論惜之

節舊志

牛應元

汪先岸

牛應元涇陽人進士萬曆十二年知光山和惠廉明盡心撫字建義倉行條鞭里民稱便邑自唐宋以來故貢葛然織工拙於爲之歲皆購自楚省民間深以爲累又邑去省有千里而遙者每歲河工物料皆派民間運納納戶赴汴中購買往往過常價數倍應元力請捐里甲葛征折黃河

草運邑民尤世享其惠又政暇著勝引錄以開羣蒙刻吏  
牘以範多士士林則之蒞任七載行取御史歷陞南贛巡  
撫繼應元之後者爲汪先岸休甯人進士萬曆十七年任  
敷政寬平操守廉潔篤志民瘼留心學校當時有蕭規曹  
隨民用和喜之誦後亦行取擢御史

節舊志

### 王用賓

王用賓號西峯興縣人萬曆四年以鄉舉任息縣令爲政  
精敏能詳利病而興除之凡所區畫皆確有條理使後世  
可遵守政成之後吏習民安他如修建學宮規模宏遠纂  
葺邑志文獻可徵尤與治教有關云

節舊志



劉庭蕙

李如松

劉庭蕙字惠徵號雲嵩漳浦人進士萬曆十四年知息縣政本經術除煩滌苛與民休息而姦胥豪蠹亦無敢依違其間以試法者博學能詩文兼善書法每公餘把酒賦詩灑然不羣人目爲仙吏所著遊蔡記七傳誦之懸官雲南提學副使又有李如松者亦儒吏也字叔操長治人萬曆二十三年以鄉舉任直亮愷悌不設城府蘇驛困鋤豪猾邑無扞網之民性好學每政暇卽遴士之雋者勸課之居恒澹泊自喜詩文落落有氣骨著天中集擢南戶部主事

節舊

志

劉一煜

劉一煜字宣仲江西人萬曆二十四年以進士授光州知州清正有守惠民愛士時郡判爲允成顧公學正爲敷教薛公皆以直諫謫清介剛方一煜虛心延訪之利無不興害無不除至今士大夫言循良者必首頌一煜云

節舊志

顧允成

顧允成字季時無錫人性耿介厲名節舉萬曆十一年進士以教授用後上疏諫並封并侵附執政者帝怒謫允成光州判官乞假歸講學東林遂不復出

節前志

薛敷教

薛敷教字以身武進人祖應旂官浙江提學副使雅工場屋文字與王鏊唐順之齊各舉萬曆十七年進士出趙南星門以名教自任會爭三王並封又上書王錫爵尋以救南星謫光州學正時允成亦以諫並封謫州判敷教與允成日進諸生以孝讓廉信課之藝文隨才器成就允成嘗謂人曰元臺壁立千仞真足風世元臺蓋敷教別號也敷教聞之曰人貴使人愛乃使人畏耶後以省母歸遂不復出光宗卽位贈尙寶司丞州諸生立祠以祀

節前志

樊玉衡

樊玉衡字元之湖廣黃岡人萬曆乙未進士二十二年知

商城淡泊寡慾神識湛如邑有猾胥持前吏短長犯法作  
姦前吏莫敢問玉衝來次第案治之遂抵以法時有中使  
奉勅採礦勢橫甚長吏多折節下之及至商玉衝獨抗賓  
主禮中使爲之氣訾但把臂稱好手者再玉衝笑曰好手  
不捉錢耳中使去僅遺以一釵心甚銜之然亦無以中也  
後調知崑山大有廉名將推銓曹以親疾乞歸待湯藥瀕  
行開敝篋示人惟手書數紙無他物也歲餘卒

崇祀各宦  
節舊志

### 李成已

李成已肥城人萬曆二十三年以進士知固始勵精爲治  
百廢俱興邑人余繼善稱其秉心塞淵諸所注措大都平

易而不阿明察而不刻廉潔而不近名益折衷於寬猛之間裁酌於時勢之宜而後敷之於政治者也陞內府中書

科

節舊志

李養正

程國祥

李養正魏縣人進士萬曆二十八年知光山蒞政以教化爲先禁異端正士習所作條約皆可師法至心存愛人不事聲威民有不率教者反覆開導之如仍頑梗不化始執法以繩其罪舊志謂其純白立操慈仁成性五年無斃杖之民四國起循良之頌其政績亦可概見矣後又有程國祥歙縣人進士萬曆三十五年自確山調知光山雖有治

劇才而賦性廉善和易近人人咸愛之其治績亦與養正

埒

節舊志

### 賈舜田

賈舜田固始縣丞萬曆十七年秋來署光山事潔已愛民一塵不染新令至交代畢庫有稅餘銀三十兩半以贈諸生半以給孤貧會部使至先示郡守云賈縣丞免考察蓋舜田清名著兩河上游無不推重也

節舊志

### 璩光嶽

璩光嶽字三谷江西人萬曆二十三年以進士任光州知州年方弱冠而才優治民有政簡刑清之頌兼能不阿權

要不畏彊禦凡民間利弊之事皆毅然任之次第興革雖有所避忌弗顧也秩滿去士民無不思之

節舊志

陳錫爵

陳伯龍

陳錫爵字媿莪廣東南海人萬曆四十一年以舉人授光州知州蒞政精明吏不敢欺新息有宦某恣橫至掾瞽人目取其瞳子置水甌中錫爵廉知繩以法不少貸潢水貫兩城出每山雨泛漲往來溺者接踵錫爵採石鳩工創石橋九孔南北與兩城巨自是郡民履若康衢凡有過者咸呼爲陳公橋云時州判陳伯龍字震東浙江蕭山人進士萬曆三十四年以知縣謫任屬文灝博數千言立就工詩

賦倅郡日與郡守陳錫爵同心興舉善政愛人育士咸號  
循良修郡城潢水橋伯龍極力勩之遂爲一州利濟擢漢  
川知縣時有水害伯龍會同諸鄰邑築防疏導民乃安生

節舊

志

許明陞

盧敏性  
陳九成

許明陞杞縣人萬厯間以鄉舉授光州學正樂易作人所  
得俸金分助貧士文名素著己酉分校陝西鄉試頗稱得  
人陞學錄厯任延安知府有政聲同時有盧敏性祥符人  
以貢生任光州司訓篤性好學深於理窟每教學者當各  
擇一字精而守之終身無失敏性常擇一乾字念念體認



事事會悟蓋亦學焉而有得者不止以文詞爲多士訓也  
明陞之後有陳九成亦祥符人萬曆季年以鄉舉任州學  
正正己率士尺寸不踰署州事簡靜廉平民皆悅之

節舊志

### 唐虞治

唐虞治字可封福州舉人萬曆三十五年任息縣教諭能  
古文詩詞教士爲文必先去其積習而後授以所學更以  
德義勸士期措之行事不徒以末藝見長後擢國子助教  
國學之士皆稱之

節舊志

### 康新民

康新民四川人萬曆三十七年以進士知固始蒞任七載

真心愛民實行課士恩威兼濟人皆畏而愛之陞禮部主事父老子弟遮道扳轅有爲盜曾經創治者亦泣送百里外新民曰爾不吾怨乎民曰非公嚴教之今不克爲良民其感人之深至如此累遷禮部尙書子孫襲恩蔭者數人

節舊志

### 孔貞會

孔貞會句容人以貢士任汝甯通判萬曆間來署固始才畧精敏實心任事值流寇猖獗盡力防禦又相固邑形勢四關外濬池築壘壯如金湯後巨寇來攻城經四十餘日卒不能下人皆以創造之功爲鉅

節舊志

許如蘭

許如蘭字相畹江南合肥人萬曆末年以進士任光州知州敦大得體其折獄之法於民先辨其醜黠於士先辨其端邪然後致詳於事故片言咸得其情尤篤於作人每月立二會手爲評閱拔其佳者集之曰浮光會業歷官所至有聲擢工部侍郎

節舊志

陳睿謨

陳睿謨號鹿萍武進人進士萬曆末年知息縣奮發有爲力以扶衰救敝自任凡病民之政如養馬協濟遼餉之類皆條列蠲減之邑弟子員限於額才不盡收力請廣之所

貽惠更遠去之後士民建祠以祀

節舊志

### 潘曾紘

潘曾紘字紹度浙江烏程人萬厯丙辰進士四十八年知  
商城心存濟物精勤爲治凡百利政以次舉興會邁旱蝗  
民大饑施粥以賑襁負歸者七千口寒則施衣病則給藥  
倉廩不足乃鬻私產以繼之次年春雨旣普霑各以行資  
遣歸尋遷去老幼送之歌泣載道

節舊志

### 張士儁

張士儁號龍洽祥符舉人天啟三年任息縣教諭性嚴毅  
與諸生燕譚非慙行嘉言不出口嘗辨義利之分曰今所

謂善古所謂利也諸生此關打不透何以上躋於高明士  
多遵其教相勉以正不敢有邪思

節舊志

徐映春

徐映春字耐成南昌人崇禎十一年以鄉舉任州守值南  
城已陷焚戮獨慘又接前牧橫暴之餘盡心撫字冰清自  
矢不畏強禦一時四境如去水火而登衽席會黃澍以開  
封司李盤查至州映春見之行憲綱禮澍急止曰如公者  
吾輩當師事之尙拘此體統耶商城馬忠愍過郡嘆曰此  
國朝三百年來有名人也其見服於上官及前達如此時  
世運已棘隨值奇荒寇盜蜂起中州郡縣殘破過半映春

猶設法賑濟民賴粗安然勢已不可爲矣辛巳映春去士  
民留之不得焉天下第一清官碑節舊志

陳蕃馬猶龍

陳蕃字青霞杭州人崇禎十年以貢士任光州添註同知  
當兵寇往來戎馬旁午時能抒方畧捍禦之又馬猶龍成  
安人崇禎十一年任州吏目性慤直有才幹時寇來犯境  
猶龍分守南城晝夜督巡兼能和輯士民併力防禦常叩  
頭於橋之南北激兩城人以忠義士民皆爲感動而當時  
者思之檄往他所遂以憤抑死於汝寧節舊志

吳鍾巒

吳鍾巒字巒穉博學善屬文崇禎元年以明經任光州司訓日與多士講課刻有淳光近藝一編七年成進士授長興知縣以旱潦徵練餉不中額謫紹興府照磨踰年移桂林推官聞京師變流泣曰馬君常必能死節已而奇果死福王立遷禮部主事抵南雄聞南都失轉赴福建痛陳國計魯王起兵以鍾巒爲禮部尙書往來普陀山中我

朝大兵至甯波鍾巒慷慨謂人曰昔仲達死璫禍吾以諸生不得死君常死賊難吾以遠臣不得從死今其時矣乃急渡海入昌國衛之孔廟積薪左廡下抱孔子木主自焚死仲達者江陰李應昇鍾巒弟子忤魏忠賢死璫禍者也

節前  
志

時敏

時敏字修來常熟人崇禎十三年以進士知固始性強明有幹畧值流寇薄城敏率士民戰守四十餘日計畫周詳賞罰明信人皆爲之戮力寇遂移去後遷兵科給事中邑人立祠祀之

節舊志

劉純慶

劉純慶號心餘沂州人崇禎五年以鄉舉知息縣風度端凝嚙笑不苟待士以禮馭下以法凡卷牘文移皆自爲之雖黠吏莫能上下其手尤精於計核出入纖悉不爽侵冒



之姦絕不敢干故賦不虧額民無流亡時寇警震鄰邑純

慶繕城垣立水砦後遂特爲保障擢知壽州

節舊志

### 吳廷禎

吳廷禎號翼菴東阿人崇禎十年以明經知息縣性精敏遇事能斷民有利病卽身任其咎凡所興革必得請而後已時練餉加派半舊額廷禎援例爭之遂得減四之三草解戶行均輸法民咸以爲便爲政寬嚴有則取予有制是皆出於自然不事矯飾又長於翰牘每走筆成文皆含至性值流寇來攻以忠義激勵士民併力固守邑城獲全士民共祠祀之

節舊志

商周初

商周初字湛軒會稽人崇禎戊辰進士初令商和易近人政從寬簡然內含剛介人不敢干以私凡黜吏舞文及豪強扞法者亦未嘗少有寬縱癸酉歲周初入覲值寇犯汝南商人皆棄城走周初請歸守民咸驚喜曰我公來可無憂矣皆還集城中周初告戒紳士與民死守寇來設法禦之寇不能克尋舉卓異遷去老穉泣送之百里不絕崇祀

名宦

節舊志

盛以恒

孫覺  
曹維正

呂維顯  
魏光遠

盛以恒潼關衛人崇禎十三年舉人知商城縣視事月餘

流賊突至却之明年張獻忠陷襄陽鄰境大恐以恒已遷  
開封同知將行士民懇留之乃登陴與鄉官楊所修洪應  
衡馬剛中段增輝共城守二月中賊奄至適雨雪守者凍  
餒不能戰以恒督家眾射賊十七人墜馬賊怒併力攻矢  
中以恒右額猶裹創拒敵賊登北城家眾巷戰死且盡乃  
被執罵賊不屈爲賊支解孫覺及典史呂維顯教諭曹維  
正皆死賊既陷商城卽疾驅犯光山城陷典史魏光遠亦  
死之十五年贈以恒副使維顯等贈卹有差纂明史又商城  
舊志載訓導孫同珥儀封人十四年城陷死節

張國光大興人崇禎十七年以鄉舉令商城時邑經殘破民戶流亡國光勞來安集不遺餘力甲申五月聞逆闖陷北京從容具衣冠曰主辱臣死余雖小臣亦當從先皇帝於地下遂自縊死

節舊志

陳籟

何述李文選

陳籟字自鳴應城人萬厯間以明經任息縣丞潔清自厲凜然無敢犯者署邑事能擔當務不肯阿娜從人當事惜其才而持之嘗自署於庭云省一分自覺受用一分愛一文人看不值一文其盟心可知矣後有何述字天行三原人萬厯二十三年亦以明經任息丞性廉潔遇事能斷剛

直不撓嘗謂志士不忘在溝壑今豈以一官易節乎奉檄  
修築河堤節省多金悉以歸官帑曰以待公用也卒於官  
囊橐蕭然士民醵金殮之乃得返葬於里同時商城丞李  
文選亦廉介吏也商城舊志稱其胸無熱要囊無私錢做  
蓋偏引清風破袖常穿明月後陞伏羌知縣士民爲立去  
思碑

節舊志

國朝

李葆玉

李葆玉字見麓山東濰縣人順治二年以貢生任光州知  
州時兵燹未靖鴻雁未集葆玉易簡樂愷有守有爲勞來

撫字通工惠商流民以次歸業又政暇闢樂育館萃州之  
秀子弟課之文教亦漸興起士民感戴稱爲清興第一吏  
節舊志

徐化成

徐化成字子騶滿洲籍順天昌平人順治五年任光州守  
州叠經寇難元氣未復化成承葆玉後加意撫綏草萊日  
闢戶口日增修學校繕城垣興廢振敝百度維新每旱祈  
禱必應三年課最擢台州太守州人爲建祠立石尋擢山  
西副使陞廣東按察使取道於光光人擁道歡迎旣而謂  
太夫人春秋高不便往返爲化成謀居停慰留懇至化成

可其請與州人執手談往事無問貴賤儼如家人因留弟侍太夫人膝下單車就道未幾卽轉河南布政使復來自光奉太夫人以往蒞豫藩十有四年凡可爲光造福者尤盡心力爲之時州鎮潢橋圯五孔修費不資爲捐俸以勸其成康熙十一年陞湖廣巡撫以他事掛冠尋卒州人祀之名宦

節舊志

吳勉

吳勉字素求其先莆田人占籍慶都好古博學爲畿輔知名士順治八年以貢生任光州守明而有威寬而有制吏役惴惴不敢犯壬辰歲歉收民間艱於輸納催科中能寓

撫字臨下端容正色嚙笑不苟復有折獄才片言中要黠者不能欺是以政簡刑清民畏而愛之又書法摹鍾繇卽尋常批示無一筆不端楷人得其隻字皆寶貴之尋陞紹興府同知後十餘年棄官來遊於光接光士及諸色人一如其在官日體貌不爲稍假寄光數月父子相繼歿州人哀之爭出資以殮送之還里

節舊志

### 劉大謨

劉大謨字孔著滄州人順治九年進士次年春蒞任州守臨民簡易不見有疾言遽色其實法在必行人不敢奸又性甘淡泊在任三年未嘗取民間一錢閒時與士子談經



校藝直披情愫如家塾課徒時陞刑部員外郎去日州人  
遮道送之大謨亦涕泣數行下

簡舊志

### 陳洪柱

陳洪柱字九巖江南青陽人順治間知光山邑經兵燹之  
後弱者困未甦强者多頑梗不法洪柱既蒞事修雉堞闢  
草萊安集流移均清賦役苞苴不久法令無私壬辰擢禮  
科給事中士民攀送載道立祠以祀

簡舊志

### 管聲駿

管聲駿字鐘石清苑人順治十一年以拔貢知光山時寇  
難初平邑雖粗安而諸務多未修舉聲駿盡心教養興利

除害吏治稱最越六載遷曹州守

節舊志

孫自俊

孫自俊字松鶴同州人順治十七年以鄉舉知光山剛方自持獎善懲惡不少假借時禁漢人投充旗下凡已經投充者皆令出旗邑紳逆僕遂倡言私家不得蓄奴僕各執其家主以叛室有焚掠主室殺其子姓者自俊督兵役捕獲悉寘之法其亂乃息後以異績遷遼州守

節舊志

馬仲融

馬仲融綏德州人順治三年以進士知固始恤民禮士遺愛足思以疾卒於任邑人視之名宦

存舊志

趙隆印

趙隆印膚施人順治十五年以歲貢知固始潔已愛民心  
存利濟凡便民之事皆併力營之不辭勞瘁卒於任邑人

請祀名宦

存舊志

衛貞元

衛貞元字淡足陽城人順治三年以進士知商城時邑經  
殘破之餘城內居民僅數十家官舍學宮皆在荆棘榛莽  
中貞元親率遺黎闢除荒蕪築城浚池建署立學諸所修  
葺以次興復邑東南界連吳楚山谷間猶有餘孽嘯據不  
時爲患貞元同將弁遍歷險隘設計捕勦并開導脅從子

以自新嘯聚者以次歛服邑中始無寇警又邑賦役冊籍舊以兵燬田混入固始而糧則累於商城貞元力爭不得遂爲民請命於上上游鑒其肫懇爲檄令丈撥之治商六年清慎廉明視民事如家事後舉卓異內遷累任江南巡按商人謳思不忘立祠祀之

節舊志

### 陳翰廷

陳翰廷字維城高安人順治十一年以貢生任商城丞性清潔不阿附勢要而鰥寡孤獨則矜恤備至先後委署羅山西平兩邑度支供奉往往稱貸自給毫不取於民間陞漢陰令去之日囊橐蕭然人咸欽其卓操

節舊志

徐麟琛

徐麟琛字玉書錢塘人順治十五年以吏員任商城典史有才幹尤嫻於武藝十六年有白蓮教妖人劫獄出囚因肆抄掠麟琛單騎逐之射殺數人賊乃潰散後雖以失城坐免而捕賊殺寇之功則不可沒也

節舊志

唐四表

唐四表字峻甫睢州人順治十三年以歲貢任商城訓導博學善屬文與邑人黃卷過蘇門題咏甚富且究心舉子業士之從學者多獲雋後陞新蔡教諭庚子登賢書康熙

癸丑以第二人成進士擢大翰林

節舊志

鄒應錫

鄒應錫湖廣蒲圻人順治壬午科舉人康熙二年由太湖令陞光州守才識明敏嘗以頃刻決十數獄兩造無不讞服尤折節愛士優卹孤寡尋以罣誤去士民惜之

節舊志

朱允治

朱允治字九敘常熟人順治乙酉科舉人康熙七年由紫陽令陞州守時以詳慎和緩四字自持謂臨民纔嚴急必不能盡其情且易爲喜怒用也故其聽讞訟獄雖小笞杖亦鮮呼屈者在郡五年潔清自厲一塵不染且以至誠待人人不忍欺嘗云違心語喉中先不能自出况欲見之行

事耶戊申歲大水壞橋梁城垣悉圯允治設法修理民力不擾大役皆就又重新文廟勵士行嚴課程終始無間己西安插移駐閩兵治廬分田悉心經畫兵民以安辛亥歲饑爲民請命蠲租又設廠賑濟民賴全活者甚眾

節舊志

### 王起岱

王起岱字潔菴江陵人康熙三年以進士知光山清介自守不取民間絲粒嘗閱月食無肉蔬蔬自給居民生祀之

今其祠在紫水塔前

節舊志

### 何之璜

何之璜字天一宛平人康熙初以拔貢知商城商東南接

壤六霍有大盜盤踞山藪嘯聚爲奸前令雖按得其狀無可如何之璜設計捕之逮繫於獄盜廣爲請托苟得不死請以數千金爲壽之璜不爲利回立出盜杖斃之羣兇解散邑故僻壤不通驛遞會餽餉蜀楚督運者移道就商勒換驢頭之璜捐俸買驢二百餘頭應之絲毫不以病民且具詳上游謂轉輸宜遵舊例不得以遠道累商上游允之至今商無餉運之擾者之璜力也蒞事三年勤慎治民廉潔處已終其任布袍疏食怡然甘之後以望誤坐免餘有雜項條議銀二百兩封貯庫中旋里囊篋蕭然不肯取以

自給

節舊志



張宏訓

張宏訓字存菴延慶州人康熙五年以鄉舉知商城心存仁愛政尙寬和簿書期會之暇嘗集士民至縣詢問疾苦并語以讀書力田之法反復諄諄宛如家人父子視事九年人懷其德陞陝西慶陽府同知未赴任卒商人罷市巷哭至今思之

節舊志

張信

張信字敬菴正黃旗籍九江人康熙十九年由太康令陞任州守接士以禮愛民以誠每訊質必和言欵語以叩民隱民得各直其情訟無寃者重惜人廉恥不肯以不肖加

之嘗已廉得其私但法如其罪而止不忍旁求以故人皆  
自勵遇早禱必竭誠夜深焚香以告晝則曝烈日中甘澍  
立應丙辰蝗已壓境急率夫捕之蝗卽颺去以故蒞光八  
載人無饑者又勤恤孤弱一日有江南案誣引州故紳家  
紳子方弱齡惴惴無所措信力爲伸釋竟得無恙嘗曰官  
茲一方一方之生命係之一著失宜卽貽累無窮事無大  
小必求出於至當而後已以異政陞刑部員外郎囊空如  
洗郡人共俛助之乃得治裝去之日士民泣送百里外節  
志

楊臣鄰

楊臣鄰字樂涓桐城人康熙十八年以進士知光山廉明  
仁恕政從寬大己未歲饑孳僅充路臣鄰亟請立粥廠五  
處賑之公費不足益以私俸又不足繼以勸捐閱四月全  
活不下萬人又捐修溫公祠每朔望率諸生禮拜畢卽闌  
明溫公教旨反復啟導諸生咸守其訓任滿以計典去士  
民遮道擁哭立祠祀之

節舊志

### 陳之禮

陳之禮字雲起仁和人康熙十二年以進士知固始平易  
慈惠與民休息興學勸墾恤孤惠貧八年如一日也陞陝

州知州有去思碑

存舊志

梁欽構

梁欽構字羽宸介休人康熙二十年以進士知固始性本樂易政尚寬大而於豪猾之民則盡法處之不少寬假時承前明之弊差徭猶多累民欽構力請豁除逃亡多歸來者復修文廟設義學作養人材以興文教秩滿擢主事歷吏部文選司郎中

簡舊志

袁舜蔭

袁舜蔭字坦如翼城人順治己亥科進士先知隆德縣以丁艱去康熙十八年補授商城令值奇荒民不堪命死亡逃散者不可悉數舜蔭爲請賑施粥全活無算邑賦徭正

額外雜派累累士民苦之舜蔭悉爲蠲除勒定畫一以示永久且念刑爲民命所關特加矜恤以滌繁苛在官五年清慎廉潔士服其德民樂其業二十二年致仕去有遺愛碑節舊志

談永祚

冀戴銓

談永祚字天錫遼東人康熙二十二年以鄉舉知商城時年方旣冠性精敏遇事能決案無留牘紳士不敢干以私吏民無所撓其法修學建廟多所創立至清丈田地計畝定稅與少尹龔戴銓躬履原隰逐一查勘上不病國下不累民邑人謂其恩德當與商並垂不朽二十八年陞蓬州

守士民立生祠祀之龔戴銓字剡溪潛江人康熙十九年以貢監任商邑丞器識遠大留心政務時邑民苦於里役戴銓贊令各里糧戶公議輸應以除報充之弊二十七年武昌兵變督率鄉勇併力防禦邑得無患及大兵凱旋道由商城檄委戴銓護送出境集店無擾田禾不傷士民咸感誦之邑中糧籍混淆賦役苦不能均談令永祚詳請丈勘戴銓贊理其事搜訪舊案彙成定例稟請上官施行使豪強無隱占之虞愚弱省偏苦之累雖令長行之其實戴銓勦助之力爲多康熙三十年陞城都令商人祀之談公永祚生祠中并立碑以志其事

節舊志

劉懋藻

劉懋藻字琴山全州人康熙二十四年以鄉舉知光山既下車見光山土瘠民頑健鬪多訟懋藻嚴加懲諭令其自新時夏逆亂楚壤與光接募鄉勇練火器教以守禦策民賴以安旋際奇荒戶口流亡過半懋藻多方招徠使之復業未幾以內召去邑人卧轍立石以誌不朽節舊志

陳汝弼

李新德

陳汝弼字愧輔福山人康熙二十九年以進士知光山汝弼知光俗素強悍難以法勝蒞任之後潔己型俗務以德感時值編審戶口舊例應派雜費悉指除之每朔望讀法

教民禮讓其有不率者俟讀法畢卽於稠人廣眾中撲責以恥之尤嚴行保甲閭閻不能容姦盜賊屏息士民共戴肖其像祀之汝弼旣去來知縣事者爲李新德字修期鐵嶺人蒞光僅歲餘政維由舊會其叔祖撫汴以例避去邑人有曹繼蕭後之思爲之誌石

簡舊志

### 陸經遠

陸經遠宛平人康熙二十四年由進士知息縣廉明勤慎精於吏治尤痼癩民瘼力以振敝除患爲務旣蒞事見邑民貧者多而逃亡相繼其故首在於簽報牌頭息舊例每里設催糧牌頭二十人二十八里約役五百餘人派擾累



累兼以催糧少遲差拘有費取保有費歇家有費未及一  
載中人之產已空經遠決計去之止用代簽鴛鴦二票令  
百姓執之赴櫃按期輸納夏五月一半冬十月全完民悉  
慶催科之不擾也相率爭輸公私俱便又年終奏銷與賚  
冊走馬諸費悉付里書應辦里書借立名色多方巧派里  
民夏收麥秋歛禾勒索無已經遠俱將里書經管事宜歸  
併於官自爲料理其弊始絕又邑中鹽引奏銷先是按畝  
派銀五釐商鬻無引之鹽民納無鹽之引且前任有派徵  
而無奏銷數年積欠相因民自正供外日受追比實不聊  
生經遠力陳其弊請募商給本運鹽銷引永革按畝科派

之害民困霍然嘗念立政首在甯民時巡行阡陌清釐保甲每十家爲一牌牌內居民互相保結間有草竊之徒里甲不與同牌者嚴法治之令改習正業由是盜源澄清外戶不閉曾署光州篆去浮用省徭役鋤豪猾緝姦宄州及息縣之民俱立石誌之

節善志

張之奇

李楫

張之奇字平子祥符人順治甲午舉於鄉康熙四年來署州學正醕厚有學行務以淑慎勉人不徒事詞章陞臨晉令諸生祖道時猶各指其質性之偏者諄誡之人各佩服不忍忘後聞其卒皆置主尸祝焉又有李楫字于岸商水

人丙午膺鄉舉學養深醅望而知爲有道之士康熙二十五年來任州學正以禮自持不隨人爲阿比教人以敦品爲先嘗謂士先器識而後文藝識不明不能窮理器不宏不能載道舍是言學不知所學何事也被其教者多務爲實踐浮薄之風一時頓息

節舊志

### 趙醅儒

趙醅儒商邱人康熙六年以鄉舉任光山教諭行端履直日舉溫公立事惟誠之說以勸諸生遷開封府教授邑諸生重其學多有負笈就正者

節舊志

### 李勝任

李勝任舞陽人康熙十九年以歲貢任光山教諭性篤孝時年已七十母尙無恙迎養至晷每晨昏膳寢必親侍之教人以孝弟爲本論文崇實黜浮士皆向其德化

節舊志

### 張 佶

張佶字吉人商邱人康熙二十二年以恩貢任商城教諭啟迪多士以德義相期許以文章爲砥礪方正不阿人無不敬而畏之在任三年以病卒官况窶甚多士哀之咸出資以贖其子乃得扶櫬歸里

節舊志

### 趙 德

趙德字鳴芝會稽人康熙二年以吏員任光山典史性廉

慎有吏治才事有不便民者必請諸令方除之戊申水災  
永濟蔡公二橋同圯身任修葺越二載民不告勞邑無濡  
者又督修文廟奉委賑饑皆不辭勞瘁董理有方秩滿遷  
去民立祠祀之

節舊志

### 馬負圖

馬負圖字祥徵山東鉅野人康熙七年以吏員任商城典  
史性敏決有肆應才時闕弁移就商城墾田令委負圖經  
其事先營城居後授田廬區畫措置軍民無擾在任五年  
以病卒人皆惜其未展厥蘊云

節舊志

### 杜廷玉

杜廷玉字美吾陝西商州人初分防汝甯值土人張其倫倡亂雞籠等處豫楚會兵協勦廷玉奉檄列行間所向有功勸止焚掠全活甚眾康熙九年陞光山汛千總有周鐵爪者聚眾獨山畝廷玉所將卒僅十餘騎因設疑兵擊之賊駭散時將軍駐汝甯欲進勦廷玉恐玉石難分詣軍門力保之邑賴以安後以秩滿遷去士民勒石紀其功德節舊志

### 梁得時

梁得時字行可鐵嶺人康熙四十年任州守聽斷明決民無冤者先是豫省雜派差徭幾倍正供撫軍徐公洞悉其

弊一切裁革他郡邑多陽奉陰違惟得時實力奉行積弊悉除生平骯髒自負恥以阿諛求容任事甫三載遂以得罪去士民遮道泣送者數千人於今猶尸祝之

節續志

劉學禮

劉學禮字可立山陰人才識明敏居京師以節俠聞康熙四十七年任州守前後凡十七年洞察民隱吏不能欺屢爲地方興修大工事集而民不擾於文士及故家子之貧落者尤多所周郵嘗奉使西藏年餘始歸州人舊多熟識接待宛如家人有訟率委曲諭解人感其誠不忍復搆後擢武昌府司馬士民爭赴汴保留以格於例不果

節續志

高 昂

高昂字普九祥符人康熙四十五年以鄉舉任光州學正秉性直方踐履篤實其課士以立品爲先諸生不循條規必嚴加詰責尤整飭學宮凡廟內牆垣偶有坍塌卽時修補前後松檜鬱然皆所手植又工書法爲光人珍藏

節舊志

楊汝楫

楊汝楫字濟菴奉天蓋平人以筆帖式初授河西令康熙二十六年補授固始才識敏達案無留牘尤心存愛民日以興復養教爲事邑舊有史曲諸河可資灌溉歷代以來渠道皆湮沒明邑令薛良張梯雖相繼濬築皆以工大費



繁未竟其利汝楫旣任事率僚屬遍履四野相其原隰高下某處可開渠置閘以通其流某處宜鑿陂樹埧以防其洩經營三載凡邑中巨滯如史曲二河次則如白鷺又次如急流羊行等河以次濬築并教以啟閉之法定爲分灌之令工訖詳請縣丞專司其政舊志謂今人食其德雖大祀不致無遺種邑民每飲食必祝之非虛語也又加意造士建書院立齋房延名宿主其席諸生薪水咸供給之邑之登甲乙科者遂多四鄉則建義學數十處絃誦之聲達乎四境尤嚴於緝盜有杜三才夏銀匠係河南劫舟盜魁潛來邑境皆廉獲立斃之境內夜不扃戶秩滿陞保安州

知州囊橐蕭然士民至今思之謂自前明以來循積異政以楊公爲居最云

節續志

### 周鴻憲

周鴻憲字葵園慈谿人康熙三十八年以進士知固始蒞任十餘載勤於職守恬淡無欲自奉常如寒素賦詩云卽今一命初邀日猶是三冬夜坐時其素志亦可概見矣邑故柴米魚肉令皆減半予價鴻憲悉給如數後致仕寓公館屠子每日送肉三勛詰之則曰日省肉數十勛十餘年矣鴻憲仍給以時價至今人稱誦之

節續志

### 馬國屏

馬國屏江西安福人以進士知商城性嚴明善折獄康熙四十九年來署固始令獄有盜犯累年不決監斃者已七人矣國屏疑之研訊數四確知其誣遂揭叅前任官盡釋之人服其神

節續志

### 黃永瑾

黃永瑾曲阜人康熙五十年以教授陞知固始御下嚴明有法搜剔積弊不遺餘力凡准理詞訟恐以差役累民將殊票付原人令其轉拘被告胥役不得勒索分毫性强立不阿嘗捕積賊張鍊臂竄匿鄰縣某宦家固索之遂被訟於郡倅永瑾憤極力請致仕歸時人無不惜之

節續志

魏玉相

魏玉相字琢文南樂人康熙五十九年以鄉舉知固始精明果毅有斷獄才尤嚴於緝盜有猾匪三人晝掠市物玉相立拘之搜其下衣得贓累累卽以梃箠其脛骨自是盜竊無敢入邑境者以才能調繁去

節續志

宋惟孜

金理

宋惟孜正黃旂舉人任固始知縣邑稱繁劇惟孜每日出坐堂判事案無留牘至聽訟以詳慎爲主每詰供不憚數四務使兩造各輸其情以故訟無大小無稱屈者又金理鑲黃旂監生精明持正人不敢干以私御胥役尤嚴內外

肅清時上憲檄訪麥價理覆以固邑皆稻田並不產麥後發價採買邑獨不受張皇人服其先見之明有盜案知其誣不憚指駁力請雪釋邑民尤其感之

節續志

### 徐立御

徐立御字乘六蘄水人雍正甲辰進士由滑縣令陞任州牧外渾厚而內精明聽斷民詞簡默鎮靜任各舉伸其說抵隙出一二語折之卽無不帖然心服御下胥推以誠猾吏自不敢欺建立社倉及育嬰堂皆有條理可垂永久自州設試院以來有收取棚費例經立御提調除歲修院宇外復備置什物以充公用餘銀造冊交代其居心清白大

概稱是尋擢東昌郡守州人挽之不得

節續志

### 馬淑襄

馬淑襄字雲子儀封人康熙壬午舉於鄉爲人尙道誼嫻禮度兄弟極相友愛並以文名著遠近雍正己酉歲部除滇南縣尹改授光州學正抵任值督院旌表節孝卽爲悉心採舉於無力者尤亟搜揚課士皆本儒先未二載遽歿

州人惜之

節續志

### 顧心錯

顧心錯字駕徐嘉善人康熙辛卯舉於鄉屢躋公車幕游秦楚間雍正七年舉茂材科發豫委用適方纂修通志充

志館校讐九年委查尉氏榮澤等縣賑務旋題署溫縣時  
督院嚴飭墾荒獨抗言溫地無荒甯棄官不以虛糧累民  
殊忤憲意既而廉其無他調繁河內辨疑獄活誣盜七人  
決煤窰數年積訟治績大著擢任光州牧熟諳典例洞達  
俗宜折獄詳允人人得伸其情數舉大工不假胥吏手故  
無絲毫擾民因公出監犯逸獄呈議改調遂引疾不出寓  
州十載年七十餘始旋里

簡續志

章琦

高鑒

章琦字彤黼江南蘇州人乾隆六年由禹州牧題陞光州  
爲人廉潔勤慎研訊民詞必悉心盡其曲折雖不尙擊斷

人實無不畏服交際不絕人權而和中有介無能干以私者僅二年丁內艱歸服闋以病不赴補十四載偶游光士民皆歡迎眷戀惟恐其去可以知其德政所感矣高鑒字曉峯鑲黃旗人乾隆九年亦由禹州牧擢任光州性篤孝父母皆衰老多疾鑒省視調攝虔謹倍至稍有不懌食飲爲之輒廢持身廉介謝絕苞苴於從事人役防範尤密苟有錙銖悉索亦必加以呵責自奉衣無華縠席無重味其儉樸雖寒士不啻也公餘卽哦詩臨帖求者踵至亦不厭煩每接見紳士必虛懷折節延訪地方利弊其言之有當者卽見諸施行嘗語人曰居官不可騁才求奇祇宜平實



做去有諷其過於清苦者應之曰多一財則多一累但得  
公私安閑浮費自省蒞官凡四年以內艱去

節續志

張肇殷

張肇殷字輅聞歙縣人以監生揀發天津河工歷署東光  
縣主簿武清縣丞前後督河使者皆稱其能凡有險工輒  
以相委素善岐黃業常爲太傅鄂公爾秦治病有效薦擢  
兵部職方司主事兼太醫院行走繼值辦理金川軍需兼  
攝武庫車駕二司乾隆十五年出任光州守甫下車卽釐  
剔宿弊一切食物工作皆按價給發不令胥役分毫侵扣  
時沈蔡連歲凶荒流民多挈眷來州覓食姦民因以爲利

國賣日眾肇殷嚴加懲治追還人婦女無算諸凡聽斷明  
決案無滯牘又敦延名宿主龍門書院敎事暇則至院校  
其甲乙前列者亟獎厲之爲定條規增膏額勸勉諄切不  
啻父兄之期其子弟者又銳意振舉殘廢首稟撫院將盡  
括學基之賃於民者恢擴廟制庀材鳩工行有日矣遽以  
疾歿士民僉引爲州之不幸云

節續  
志

### 竹 箴

竹箴字攀程滎澤人乾隆十三年以歲貢任光州訓導性  
篤實與人語動見至性又能甘貧苦日用惟蔬素客至卽  
出以食客諸生有行誼者來晉謁無不款留竟歡是時督

學漳閩蔡公盡心造性增定月課程式箴奉行惟謹每月彙士校文按切義法其所置甲乙蔡公率以爲當鮮所更定多士日以私藝求正者履滿戶外居二載以老告歸節續

志

謝 鎧

謝鎧字潛齋大興籍浙江山陰人庚戌進士歷任劇邑以金川軍功陞雲南知州改授禹州乾隆十六年委署光州才情明達署中不辟幕友一切文移皆手自裁定批示訟牒語無多而情僞曲盡吏皆慄慄不敢舞一辭雅擅知人冰鑑於文行優異者傾懷相與稱之不啻口出半載當代

去奉檄駐商城緝捕逆匪馬朝柱黨與尋以捕獲逆黨功  
撫軍蔣公炳特疏題授光州踰年又以知府薦赴部引見  
歸途丁母憂囊橐如洗僦居民舍州民僉爲資其薪米服  
闋擢江甯府知府子清有文行己卯中北闈鄉式節續志

吳一嵩

吳一嵩字位中新建人乙丑進士揀發來豫歷陞禹州尋  
題授光州慈祥愷悌曲體輿情凡事皆以從容理之不爲  
嚴限峻法而持躬甚廉防胥吏甚密數值軍需河工大役  
皆覈實措辦不以絲毫浮費累民遣諸役率以籤掣均其  
勞逸杜其勾串勤於聽斷雖隆冬盛暑不少間政暇卽招

集諸生課詩文手定甲乙又創建弋陽書院五十餘間以處學者并擴置龍門書院學田數處其經畫皆可垂久遠蒞州七載屢經撫院卓薦因緝案逾限解任尋改補甘肅甯州州人如失慈母

節續志

### 金四德

金四德崇安人乾隆六年以進士知固始清正自持嚴於御下凡訟詞皆當堂收接不假僕役手一日闢人偶收民和詞四德卽坐大堂呼出責而逐之隻身獨影妻孥無在署者甫一年以勞瘁卒人無不憐之

節舊志

### 張準

張準睢州人乾隆二十三年以歲貢任光州訓導性醇謹  
遇人未嘗有疾言遽色課士以崇實爲本力祛浮華年逾  
七十請致仕有留之者準曰敎官責匪輕既耄之人烏能  
勝其在遂堅意求歸時論高之

續

### 李鴻藻

李鴻藻號詞臣山東歷城縣人性倜儻幼習武事有胆畧  
膂力過人咸豐三年粵匪擾燕豫及山左右各省奉

旨辦團練爾時承平日久民不知兵衆難之鴻藻身任其  
事布置有方堵禦救援屢有成效遂以監生保縣丞分發  
河南咸豐五年到省候補大吏知其能派委管帶省垣團

勇訓練調度衆皆悅服其製匾額稱頌出隊勦匪所向克捷蒙保補缺後以知縣用十年補固始縣丞權知息縣事以功保同知

賞戴藍翎息爲光屬巖邑正當匪衝每聞警必督練出城相機剿捕迭有擒斬十一年十月二十五日探得段家圍賊匪有撲城之信鴻藻卽親率團勇邀賊於城西呂家廟怒馬當先大呼陷陣手刃賊數十名團勇亦奮力衝殺無如身大重圍寡不敵衆登時陣亡時年五十三歲家丁趙壽徐魁隨同戰沒團勇亦有傷亡僅將其屍身捨回首級尙無下落事聞奉

旨從優議卹著於殉難地方建立專祠時閱三載同治甲子夏團練大臣毛部堂大營駐紮息縣盡誅巨逆搜獲段家圍擒匪盧景環一名卽下手戕官取其元者供稱其首置瓦盆內仍覆以盆埋於園外麥場正中深尺許再三究詰又供現時李官卽在堂上怒氣凜然不敢妄供其英靈顯赫令人起敬如其言果掘得之卽將首級埋於西關外大道旁立有碑碣並將該犯凌遲活祭以慰忠魂長子俊號子旃武生候補把總咸豐四年在臨清陣亡父子殉難各蒙

賜卹世襲雲騎尉



汪兆琛

汪兆琛號同甫山東歷城縣人候補布政司照磨咸豐五年二月署光州州判三月西鄉藍橋灣匪首林其開等聚衆擾亂四月二十日有匪馬數十匹突至署聲稱縣役投文門丁顧姓差役陳良卽向取文猛然持刀亂刺二人卽時殞命兆琛當時出立階下高聲理論被賊羣戕殉難五月十五日奉

旨照陣亡例議卹

海進忠

海進忠字景岳裕州人狀貌魁梧善騎射舉止閑雅有儒

將風家素負汝甯營候補外委以獲犯功補息縣經制賞  
戴藍翎到任後勤於緝捕屢獲巨匪擢升光州營中軍把  
總待兵嚴而有恩衆咸悅服咸豐五年新息匪徒易添富  
等圍攻州城西門爲受敵之所進忠分守至夜分賊攻益  
急兵勇驚怖欲散進忠亟止之囑令鎮靜固守匪撲城近  
親放大炮矢石齊發斃匪甚多匪知城守堅備始退去進  
忠目不交睫者五晝夜身未下城十有餘日州城得以保  
全者進忠之功居最七年冬髮逆數萬圍攻固始時鄭松  
峯中丞任光州聞警會營議防堵進忠曰固始州之門戶  
賊氛一西移則州城困矣鄭升州以爲然協進忠直抵固

之西十餘里小河橋聚營與賊壘相拒賊幾欲西竄而進忠督精銳日夜露處身冒矢石負死捍禦賊因不敢西犯計九十餘日固始解圍叙功擢安陽縣千總鄭升州以其有將才保留行營仍在汝正新息一帶勦辦匪徒屢著勞績以都司升用賞換花翎十年八月初六日在汝甯府官庄地方與大股捻匪陳大喜等接仗衆寡不敵大隊已潰進忠躍馬突入賊隊縱橫冲殺手刃數十賊奈身受九傷力竭陣亡事聞奉

旨

卹廕如例時年四十六歲其繼子海長齡搬柩回光葬於州

之南郊至今州人士過其墓猶慟心焉